

## **Asunto: solicitude de continuación do SNL de Rianxo**

Anxos Sobriño Pérez, como presidenta da Coordinadora de Traballadores/as de Normalización da Lingua (CTNL), con CIF G-15542897, enderezo postal no apartado de correos 170 de Santiago de Compostela (CP 15702), enderezo electrónico info@ctnl.gal e teléfono de contacto 629 571 950,

### **EXPOÑO:**

O Concello de Rianxo leva contando **desde maio de 2017** cun **servizo de normalización lingüística (SNL) estable** (<https://concelloderianxo.gal/normalizacion>) **dotado dun posto técnico** que na actualidade está vacante.

Durante os máis de cinco anos que estivo en funcionamento, este SNL planificou, xestionou e executou numerosas accións para promover o uso e o prestixio da lingua, alén de colaborar con outros servizos en campañas conxuntas, traballo colectivo que enriquece os proxectos e contribúe a optimizar recursos, ideas e resultados. Grazas a contar co SNL o Concello de Rianxo participou en programas como **Enreguéifate** (<https://enregueifate.gal/>), **Club de Debate, Youtubeir@s** (<https://youtubeiras.gal>) ou o **programa Apego** (<http://apego.gal/>). Dentro deste último mesmo desenvolveu actividades promovidas especificamente desde Rianxo, como **A ruta do Apego** (<https://rutadoapego.rianxo.gal/>) ou **As miñas 25 primeiras palabras** (<https://concelloderianxo.gal/librodaspalabras>). Tamén son destacables campañas exclusivas deste concello como **En Rianxo ao noso xeito** (<https://concelloderianxo.gal/aonosoxeito>), destinada ao comercio e á hostalaría, ou o impulso da publicación **Cancioneiro escolar urxente de Rianxo** (<https://concelloderianxo.gal/cancioneiroescolarurxente>), co fin de recuperar o patrimonio cultural, musical e lingüístico da vila.



Con todo, desde o pasado mes de setembro o servizo de normalización lingüística deste concello está sen actividade e sen continuidade inmediata por non contar con persoal técnico.

As entidades locais de Galicia teñen entre as súas competencias a normalización lingüística, é dicir, a promoción do uso e do prestixio da lingua galega en todos os ámbitos de influencia da entidade. Así o aclararon (<https://i.gal/vhRBp>) en 2018 a Dirección Xeral da Administración Local e a Secretaría Xeral de Política Lingüística, coa redacción e difusión do *Informe sobre a prestación do servizo de normalización lingüística pola Administración local en exercicio de competencia propia* (<https://i.gal/F1yH5>, incluído tamén como **anexo I**).

As ferramentas de traballo das administracións públicas para exercer as súas funcións son os **equipos técnicos especializados**, tanto no departamento de urbanismo ou no de servizos sociais como no de lingua. É imprescindible un departamento técnico ou SNL estable, dotado de persoal e orzamento suficiente, para analizar a situación da lingua na entidade local, no municipio ou na comarca, asesorar a entidade en política lingüística e para **planificar, xestionar, executar e avaliar accións e programas de normalización lingüística** que interveñan nas áreas prioritarias onde o galego perde prestixio ou utilidade. En definitiva, **os servizos de normalización lingüística son necesarios para que os concellos poidan exercer de forma eficaz as súas competencias en normalización lingüística.**

Alén disto, o traballo de normalización da lingua, que procura transformacións sociais e o afianzamento da autoestima lingüística, necesita ser desenvolvido con continuidade para non perder eficiencia. A paralización dun servizo deste tipo non supón unha simple interrupción temporal do traballo, senón un retroceso no labor cotián e na implantación do departamento técnico na institución. No caso de Rianxo, **este retroceso é facilmente evitable cunha próxima cobertura da praza de técnica/o de normalización lingüística**, para non interromper máis tempo todas as accións que desenvolve o servizo e que con certeza as persoas destinatarias botarán en falta.



Polo tanto, SOLICITO:

- Que o **Concello de Rianxo cubra** o antes posible **o posto vacante de técnica/o de normalización lingüística**, para continuar contando cun **departamento especializado que planifique, xestione, execute e avalíe accións e programas de normalización lingüística.**

Pontevedra, 15 de febreiro de 2022

Anexo:

- I. Informe sobre a prestación do servizo de normalización lingüística pola Administración local en exercicio de competencia propia